

強取藥臼行未及縣王朝家舉二十餘口兩三日中相次俱死
藥臼今在潭州麓山寺中寺中有犯者輒病極有靈驗

真宗皇帝御製天童護命妙經序

夫妙本無窮至真善應可道而非常道無爲而靡不爲是以瓊
簡瑤函爰敷寶訓雲章鳳篆咸演秘文標示明科形容造化所
以宣揚博利欲助洪鈞爲善教之筌蹠道含靈之耳目朕獲膺
元命茂育羣黎冀廣真詮潛資庶品以天童護命經者

太清密語金闕真符素有前徵播於別錄其或洗心誠誦結念
奉持固可卻厲蠲邪臻和致壽類義圖之立象幽贊神明同夏
鼎之除祲不逢魑魅愈凶災於六極集戩穀於百祥因模寫以
頒行乃標題而敘列所期寰海共樂生成云耳

太上天童經靈驗錄

益州西門內石笋街百姓李萬壽者年五十餘景福元年壬子
歲三月中值亂城門盡閉家道罄竭親屬二十餘口悉皆淪沒
萬壽一身窮悴其月城開之後遂往漢州投託親知行至新都
縣覺日色猶早乃更前去殆至昏黑無處止息遙見西山之下
隔橋似有人居茅齋四向園林森聳萬壽至門叩扉良久一女
子出年纔及笄忽見萬壽甚驚問曰君是何人因何至此萬壽
曰欲往漢州至此抵夜願寄一宿希不艱阻女子曰君宜速去
此不可住萬壽再三懇告乃曰緣妾夫婿非人也萬壽堅問其